



BELIEVERS EASTERN CHURCH

World Church Headquarters, St Thomas Community

Thiruvalla - 689 103, Kerala, India

लावखारनि लाइजाम

जानुवारि-फेब्रुवारि 2026

आंनि गोथार गिर्जानि लावखारफोरनिसिम आरो गासैबो फोथारिफोरनिसिम,
बिफा, फिसा आरो गोथार जिउ, सासे ईसोरनि मुडाव। ✠आमेन।

बावैसो सिगां जों मोत्रैसो गेदेर फोरबोखौ फालिखांबाय- बेनो जादों ख्रीष्टमास आरो थेवफानि, जाया जिसु ख्रीष्ट'नि जिउआव मुलुगनां गिर्जानि गेजेराव मोत्रै गायसन्थायारि आरो लोब्बा गोनां जाथाय। ख्रीष्टमासआ जोंनि फोरबु ख्रीष्ट'नि मानसि महरै जोनोम लाफैनाय फारसे नोजोर होयो, जेराव थेवफानिआ जरदान दैमायाव बिनि बाप्तिस्मा लानो थाखै नुजाफैनाय- ईसोरा गावनो साथामसे महरै नुजानायखौ आरो सुबुंफोरनि गेजेराव बिनि हाबा जागायनायखौ नोजोर होयो।

दानिया, जों बे गेदेर उदै बासिनायनि जाहोनफोरखौ नायनि।

बाइबेलाव जों फरायनो मोनो दि, गावनि बे संसारनि हाबाखौ जागायनाय सिगां, जिसुआ ब्रैजि सान उदै बासिदों, जि समाव बियो सैथाननि आन्जादखौ देरहादोंमोन।

जिसुनि उनसंदानखारिफोर जानायखाय, बिनि जिउ आरो बिदिन्थि बादि मावनो थाखै - हारिं एबा जयै, जोंखौ सानफ्रोमबोआरि जिउआरि गुरग'नायनि थाखै, मोनसे समखौ थख' थिनानै दोन्नो थिन्दों।

गेदेर उदै बासिनाया मोनसे बोथोर, जाय बोथोराव, आब्रुथिगोनां उदै बासिनाय, आर'ज बिनाय आरो गोसो गाबफिन्नायजों, जों गाव गावखौनो गुरै खालामो आरो फोथारजानो हांग्रियो। बे बोसोरनि गेदेर उदै बासिनाया फेब्रुवारि 15 निफ्राइ जागायो आरो इष्टेर, बे जाबाय जोंनि फोरबु जिसु ख्रीष्ट'नि सिखांफिन्नायखौ फालिनायजों एफ्रिल 5 खालाराव थुंगे हैयो।

बे बोथोरनि थाखै जोंनो गोथार गिर्जाया होलांनाय जिउआरि आब्रुथिनि मोनथाम खुन्थियाखौ बजबनानै लानो थाखै आं नोंसोरखौ थुलुंगा होनो सानो: बेनो जादों- उदै बासिनाय, आर'ज बिनाय आरो दान होनाय।

1. उदै बासिनाय

जेब्ला जिसुआ उदै बासिदोंमोन, सैथाना फैनानै अन्थायफोरखौ रूति बानायनानै मोदोमनि उखैनायखौ सुफुंनो थाखै आन्जाद लाफैदोंमोन। नाथाय जिसुआ बे बाथ्राखौ बुंनानै बिखौ फेजेनदोंमोन, "मानसिआ सिथावजोंल' थाडा, आनथाइ ईसोरनि खुगानिफ्राइ ऑखारनाय फंफ्रोमबो बाथ्राजोंसो।" बेजोंनो, जिसुआ जोंनो दिन्थिदों दि, जोंनि जिउनि नांगौआ मोदोमनि गोनांथिनिखुइ बेसेबा गोनांसिन।

जों गावखौनो आब्रुथिआव लाखिनायजों—जेखौ जों जादों आरो जेसेबां जादों— बे जाबाय उदै बासिनाया जोंखौ ईसोरनियाव थारलायै सोनारनानै थानो फोरोडो। बबेखानि, ईसोरानो जोंनि गासै नांगौफोरखौ जगायखायो।

नाथाय उदै बासिनाया आदारनिखुइ बेसेबा ओंथिगोनांसिन

गोथार सास्थोरा आरो गिर्जानि बिफाफोरा जेरै फोरोडो, जोंखौ गासै फापनि हुदाफोरनिफ्राइ उदै बासिनो थिन्दों—उदायि रायलायनायानो जाथों, रायखोमानायानो जाथों, मेगन सानायानो जाथों, एबा आथिखालनि जानगार होग्राफोरानो जाथों जायफ्रा जोंनि समखौ खावनानै जोंखौ स्रोतयै लें बानायो, बेफोरनो जादों बांद्राय ससियेल मेदियाखौ बाहायनाय, थुंगेनाय गोयि बोदला बोदला नागिरनाय, आरो खुसि खालामनो एबा मिनिहोनो थाखै जेब्लायबो नांगौ जानाय। बेफोरजों सालायजानायनि सोलाय, बेफोरखौ बाहायनो रोडोब्ला, जों खीष्ट'नि जिउखौ जोंनिआव देरनो खथा होनाय जायो।

2. आर'ज बिनाय

उदै बासिनाया आर'ज गैयाब्ला जिउनि थाखै मुंबो ओंथि गैया। बिनिखायनो गोथार गिर्जाया बे बोथोरनि समाव बेलासिफ्रोमबो मोनसे आर'जनि समखौ दोन्दों, आरो बयबो फोथायारिफोरखौ ईसोरनिआव फैनानै बिनिफ्राइ निमाहा आरो अनखांनायखौ बिख'नानै लानो थुलुंगा होदों।

बेजों लोगोसे, गिर्जाया जोंनो जोंनि गावनि आर'ज जिउनि थाखै मोनसे गोखों आगजु होदों—जिसुनि बिनाय आरो आर'जनि माला। जिसुनि बिनायखौ बि— “फोरबु जिसु खीष्ट', ईसोरनि फिसा, आं फापिनि सायाव, अनखांहर”— बे नोंनि सानफ्रोमबोआरि आर'जनि मोनसे बाहागो। बे आर'जआ, आरो आर'जनि माला, आनो जादों गोदोनि गिर्जानि गोथार फोथायारिफ्रा थाथ'आ जासे आर'ज बिनो सोलोंदोंमोन (कलसिया 4:2; 1 थेसाल'निखा 5:17)।

जिसुनि बिनायाव जेब्ला मोनफ्रोबो गान्थिया जोंनि आसिनि गेजेरजों बारलाडो, आर'जआ जोंनि गोसोआव हाबलाडो, सोलाय होयो आरो जोंनि गोसोखौ ईसोरनि गोसोजों मोनसे खालामनानै होयो।

3. दान होनाय

गोरिबफोरखौ आरो गैजायिफोरखौ नायनाया सासे ईसोरनि फिसानि मोनसे एंगार हायि मावबिबान। गुबुननि फारसे आखाय फोलावनाय आरो अन्नखांनाय गैयाब्ला, जोंनि उदै बासिनाय आरो आर'जआ आबुं जाया। गमामायै, जेसाया नाबिया फोरोंदों दि ईसोरखौ खुसि खालामनाय उदै बासिनाया बेसो जाया गोरिबफोर आरो नासयजानायफोरखौ जोथोन लायो (जेसाया 58:7)।

बेखौ मावनो हानायनि माखासे मावखिन्थिफोर:

1. गंसे न'खर हिसाबै गिर्जानि गासै हाबा-हुखाफोराव बाहागो ला

गेदेर उदै बासिनाय बोथोरा जोंनि दनायफोरखौ गुबुनफोरजों रानलायनायनि थिरांथाखौ फोदानायनि मोनसे मेहेरगोनां सम— जों बे बिथिंआव गोसोगोनां, मावथि आरो जौगालां नांगौ। फोरबुआ जोंखौ गोसोखां होदों, “...नोंसोर आंनि दुइसिन फंबायफोरनि सासेनि जुनै खालामनायानो आंनि लागै खालामनाय जाबाय” (माथाइ 25:40)। जों बेखौ माखासे राहाफोरनि गेजेरजों मावनो हायो: गेदेर उदै बासिनाय बोथोरा, गंसे गिर्जा हिसाबै, जिसुखौ खाथियै उनसंनायनि मोनसे हान्थिनाय जायखौ जों लोगोसे हान्थिदों। जों गावबा गावयै उदै बासिनाय आरो आर'जआव नांथाबब्लाबो, जोंखौ न'खर आरो समाज हिसाबै मावनो थाखै हांखायदों। बिनिखायनो, बे बोथोरनि समाव, जोंनि न'खरखौ लाफानानै बेलासिफ्रोमबो गिर्जायाव जथुमनाया गोनांथार।

2. बेंजलायनायजों जागाय

जिसुआ बुंदों, "आर नोंसोरो आर'ज खालामनो गसंनायाव नोंनि मनाव सोरनिबा सायाव माबा जेडा दंब्ला, अब्ला बिनो खेमा हो, अब्लानो नोंसोरनि सोरगोआव थानाय बिफायाबो नोंसोरनि अफरातखौ खेमा होगोन" (मार्कुस 11:25-26)। गोसोआव गुबुननि फारसे मुगैनायजों बुंफबनाय, सुथुरथि एबा निमाहा होयै थायोब्ला, जों ईसोरनि साखाथिआव साफिनो हाया। बेनि थाखैनो, गिर्जाया गेदेर उदै बासिनाय बोथोरखौ बेंजलाय होनाय हाबाफारिजों जागायो, आरो जों बे हाबाफारिआव बाहागो लानाया गोनांथार। जोंनि फारसे गोरान्थि खालामनायफोरखौ निमाहा होनि, जोंबो दुखु होनायफोरनि खाथियाव निमाहा बिनि, गावखौनो गुरै खालामनि, जेराव गावस्रालायनाय दं, बियाव सान्थिखौ फसनि, आरो ख्रीष्ट'नियाव मोनसे मोदोम बादि थानो गोसो होनि।

3. गोसो गाबखांनाय आरो सिमान लानायाव नांनानै था

बे उदै बासिनाय बोथोराव, ईसोरनि खाथिआव साफिनायनि गेजेरजों गोथार जिउआ जोंनि गोबां फापफोरखौ मोन्दां होगोन— जेरै जोंनि फैमाल आरो मावब्र'नाय हाबाफोर। उगुल थुगुल जानो नाडा। बिफोरखौ गोसो गोथारै सिमान ला, गुरै जानायजों गोसो गाबफिन, आरो ईसोरनि अनखांनायखौ नागिर। नों बबेबा आन्जादआव खनले खनले जुजि नांदोंब्ला, निरासा दाजा। नोंसोरनि दौरि एबा गिर्जा सालायग्रानि सिगाडाव दोनख्मानाय गैया जासे रोबां रोबां खिन्था, आरो सिमान लानायनि साक्रामेन्टनि गेजेरजों बेंजलाय जा आरो नोंनि जिउआव सुस्राजानाय आरो सोखाजानायखौ नाजावनानै ला।

बे गेदेर उदै बासिनाय बोथोरनि हान्थिनायाव नोंखौ हेफाजाब होनो थाखै जोंनि गिर्जायाव गोबां जिउआरि हेफाजाबनि फुंखाफोर दं, जेरै जोंनि गावआरि जिउ आरो न'खर आर'ज गिर्जानि थाखै सानफ्रोमबो सारथोर फरायनाय, आरो सानफ्रोमबो उदै बासिनायनि सायाव धेन होनाय आरो सानफ्रोमबो लिटार्जिआरि आर'ज बिनाय। बे दौलतफोरखौ एबा फुंखाफोरखौ फुरायै बाहाय, जाहाते गेदेर उदै बासिनायनि जाहोनआ नोंनि आरो गिर्जानि थाखै अंथिगोनां जायो।

आंनि आंगो अनजाग्रा फिसाफोर, आं नोंसोर साफ्रोमनिबो थाखै आर'ज बियो, जाहाते बे गोथार उदै बासिनायनि सानाव ईसोरनि दयाया नोंसोरखौ गोखों खालामनाय बादि। ईसोरा गावनि गोसोनि लुबैनायखौ मिथिस'नो नोंसोरनो गियान, बिनि बिथोनफोरखौ मानिनो बोलो, आरो बिनि अनखांनायखौ बयनोबो होनो अन्नायखौ होथों। ख्रीष्ट'नियाव नोंसोरनि जिउनां बिफा जानायखाय, आंबो बे गोथार बोथोरनि समाव नोंसोरजों हान्थिफायो, आरो लोगोसे, फै जों फोरबुनि आसिर्बादखौ नागिरनि।

गोथार साथामसे; बिफा, फिसा आरो गोथार जिउआ गावनि उसिग्लायनाय दया आरो अनखांनायजों जोंखौ दैदेनथों आरो गासै गोथारफोरनि आरो थेवथ'कसनि बिस'नाया जोंनि थाखै दा आरो जोबथारा जासे ईसोरनि राजउलाफातनि सिगाडाव रैखाथि जाथों। ✠आमेन।

नोंसोरनि अन्नाय आरो आर'जजों,

✠मरान मर सामुवेल थेवफिलास मेट्र'पलिटान

खालार: जानुवारि 21, 2026

हालाम: वर्ल्ड सार्च हेडक्वार्टर्स